



EDITOR:
Bonaire Communication Services N.V. | **Djárason 07 yuni 2023** | **Preis: \$1.25**

AVENTURA DI SGB TA PERHUDIKA ALUMNO

Bahada di solo Seru Wecua



Oscar Martijn kende ta forma parti tambe di nos, a kompartí ku BONERIANO un bahada di solo ku parse un plachi den buki. Interesante pa mira bahada di solo for di diferente ángulo di nos isla. E foto ta saká for di Naguati suít ku bista riba seru Wecua.

PA TUR BO
PIESA I TIRE
PA BO AUTO,
BUS OF TRUCK

KAYA CARLOS A. NICOLAAS | 717-6272

/dabboussimotors

97% di nivel 4 a slag

Promé grupo studiante ICT di MBO a gradua

KRALENDIJK -- Tres aña pasá MBO a start ku dos estudio ICT nobo, All-round Medewerker IT Systems & Devices, nivel 3 i Expert IT Systems & Devices, nivel 4. E promé studiantenan ku e tempu ei a

kuminsá ku e estudio, luna pasá a pasa èksamen final i ku gran éksito. No ménos ku 97% di e studiantenan di nivel 4, a slag. Ademas tur studiante di nivel 3, tin mag di risibí un diploma, un resultado inkreibel!

A realisá e estudionan den kolaborashon estrecho ku ROC Mondriaan na Hulanda. No solamente nan a traha huntu pa duna e estudionan forma i koló, pero tambe ROC Mondriaan ta involukrá den eksami-

nashon.

Den aña eskolar 2021-2022, un delegashon a bini Boneiru pa yuda ku eksaminashon di e èksamennan na nivel 3. E aña akí nan tabata presente atrobe pa eksaminashon di e klasnan di èksamen final na nivel 4.

E eksaminadónan eksterno di ROC Mondriaan ta mashá satisfecho ku e estudionan i nan ta impreshoná ku kalidat di e studiantenan.

Martijn Rotteveel, dosente IT di ROC Mondriaan, kende for di promé ora tabata envolví den desaroyo di e estudionan ICT nobo, ta indiká: “Na promé bista e tabata parse un tarea

imposibel, na di dos bista un tarea desafiante i na final un tarea fantástiko.”

Liset de Keijzer, direktor di unidat interino di MBO, ta pone énfasis riba e kolaborashon agradabel: “Tur esaki lo no tabata posibel sin ROC Mondriaan. Danki na nan i na empresa i institutonan na Boneiru, nos tin dos estudio na nivel ku ta konektá bon ku e demanda for di merkado laboral. Mi ta orguyoso di nos studiantenan i ta deseá nan hopi éksito ku nan siguiente stapnan.”

Dia 4 di yüli e studiantenan di ICT ta risibí nan diploma durante un anochi festivo.



Pronóstiko di tempu pa Boneiru

Djamars 06 te Djáragon 07 Yüni 2023
De bes en kuando solo, seku i calor

Awe i djamars ta parsialmente nublá. Lo keda seka i lo ta mas calor ku nòrmal. E temperatura máksimo lo ta 34°C, e temperatura mínimo 28°C. E bientu ost ta moderá te basta fuerte, 4 te 5 Bft.

Altura di ola: 1.0-2.0 m (4-6 pia)

* Altura di ola válido pa laman grandi



Rijksdienst Caribisch Nederland

VAKATURA

Bo tambe ke traha pa RCN?
Bo por solisitá pa e siguiente funshonnan:

BCN - Kolaboradó Kobraansa
JICN - Kordinadó Sentro di Re-integrashon (RIC)

Mas informashon?
Bishitá www.rijksdienstcn.com/vakatura

Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com

Ku profundo tristesa den nos kurason, pero intensamente agredido pa tur lokual e la nifiká pa nos, nos ta partisipá ku a bai laga nos den brasa di Señor nos estimado i kerido

Arthur Etienne Cecilia

mihó konosi komo “Turbo Jet”
10-10-1969 - † 28-05-2023

Na nòmber di su mama:

Cipriana ‘Jeana’ Cecilia-Statie

Tata:

† Artur Salvio ‘Tuyo’ Cecilia yunan:

Arthuro ‘Payo’ Soleana

Ettienne Cecilia

Gabriel Wanga

Rumannan:

Marie-Jeane i Jeffrey Schoop na Hulanda

Jean-Pierre i Sislin Vlijt

Charlene i Marlon Concession-Engelhart na Kòrsou

Rumannan di kriansa:

Arthuro Cecilia i famia na Hulanda

Jeremy, Hadassa i Denzl Statie

Gianna Statie

Nietunan:

Jhairo i Roano Soleana

Sobrinu- i subrinanan:

Nigel Lepelaars i Nofia Miyayani na Hulanda

Zahid Frans

Kevinson Cecilia

Kendrick i Nwanka Cecilia na Hulanda

K’vyon Cecilia i Louen Lepelaars

Cristal i Chanique Concession

Su padrino, su tantanan, tionan, prima- i primunan, suá- i kuñanan tur ku nan respektivo famianan.


Amiga- i amigunan, SV Estrellas, staf personal di fábrica Balentina

Demas famia: Cecilia, Statie, Engelhardt Concession, Lepelaars, Soliano, Frans, Vlijt, Domacasse, Walters, Hessel, Joseph, M’Garvey, Cicilia, Martijn, Anthony, Silberie, Janga, Evertsz, Boezem, Melaan, Soleana, Salbach, Thomas, Peluso, Gomperts, Abrahams, Ellis, Martinus, de Palm, Emerencia i Wanga.

Si den nos tristesa nos por a lubidá nomber di un famia, amigu(a) òf konosi, nos ta pidi nos diskulpa.

Kremashon a tuma lugá di seno familiar.

Pa deskanso di alma di Turbo tin 2 santo sakrifisio di misa, djaweps 8 di yüni i djasabra 10 di yüni pa 7.30 anochi na misa di La Virgen di Coromoto na Antriol.



AVENTURA DI SGB TA PERHUDIKA ALUMNO

KRALENDIJK -- Pa aña eskolar nobo, Komunitat di Skol Boneiru, SGB, ta bai introdusí un klas nobo, un klas heterogéneo. E klas akí ta pa muchanan di grupo 8 di skol básiko ku ta bai SGB. Ta un klas kombiná pa alumnonan di MAVO i kader.

Komishon di Mayor di Liseo ta hopi preokupá ku e desishon akí i ta puntra sí no ta un aventura e skol ta bai drenta ku introdukshon di e klas akí.

Segun e komishon di mayor, e tin motibu pa pensa esaki. Den un kòmbersashon ku tabatin ku di-

rektor di unidat di Liseo na novèmber 2022, a informá tokante introdukshon di e klas. E direktor a primintí ku e introdukshon no ta tuma lugá sin konsulta i sin hasi palabrashon ku e komishon.

Na yanüari e komishon a tuma nota den prensa ku tòg ta bai kuminsá ku e klas.

Na vários okashon e komishon a pidi pa pone un paro na e plannan pa introdusí e klas. Motibu pa esaki ta e maneho unilateral di Liseo. E ta kansá ku e kultura na e skol di imponé i fòrsa desishon.

Puntonan konkreto di e

komishon kontra introdukshon di e klas ta entre otro resultadonan di un bon investigashon tokante introdukshon di e klas heterogéneo no ta konosí. Tampoko a enbolbí mayor, alumno i dosente, miéntras a kambia bukinan di matemátika di MAVO sin pone mayor na altura. Ku esaki no ta sigur si alumnonan por sigui despues pa HAVO.

A keda ku Liseo lo a manda un dokumento di powerpoint pa mayor i bolbe invitá nan.

Te ku awe no a kumpli ku e promesa akí i mayornan mes a tuma e iniciativa

pa pidi un reunion.

E kriterionan ku ta bai usa den e aventura akí no ta konosí, no ta konosí kua dosente ta bai duna lès i sí e dosentenan konserní a haña preparashon pa duna lès diferensia den klas heterogéneo.

Último añanan tin problema grandi den organisashon na Liseo. Tin hopi ehèmpel di esaki.

E komishon di mayor ta puntra sí por regla klas heterogéneo promé ku e trayekto di reorganisashon i e areglo pa bai ofer pa e klas heterogéneo no ta konosí.

E komishon ta haña ku ta tempu pa porfin bini reashon riba e puntonan akí.

E komishon ta skirbi: “Si no bini reashon, lamentablemente nos mester konklui ku intensionalmente outoridat kompetente ta eksklui mayor. Den e kaso ei, nos ta bai sigui ku nos akshonnan den prensa pa informá siudadano, mayor i alumno. Nos ta spera ku ta importante pa SGB pa yega na un bon solushon. Nos ta lamentá tambe ku mester komuniká via prensa tokante e asunto akí, pero no tin otro opshon.”

Hulanda i Merka ta keda

Merkado mas grandi turista di estadia

KRALENDIJK -- Tourism Corporation Bonaire (TCB) ta anunsiá ku na luna di mei Boneiru a yama bon biní na en total 12.609 bishitante di estadia. Na luna di mei di aña 2019, a registrá 12.100 bishitante di estadia. Ku esaki a registrá 4% mas bishitante di estadia, kompará ku luna di mei

2019. E dos merkadonan di prosedensia mas grandi pa nos isla, ta e bishitantenan hulandes, en total 5687, 47,0% i 3041 bishitante merikano, 25,4%.

E bishitantenan di estadia hulandes ta prinsipalmente prosedente di e provinsianan den parti sùit i parti nort di Hulanda, miéntras ku mayoria

di bishitante di estadia for di Merka ta bini for di e estadonan Florida, New York, California, Pennsylvania, North Carolina i Texas. Mas aleu na 2023 tur e bishitantenan pa Boneiru tabata prosedente di Kòrsou.

Alemania tambe a bini dilanti komo merkado prominente pa Boneiru, ku 284 bishitante di estadia registrá na luna di mei, di manera ku luna pasá Alemania a bira e di kuater merkado ku a pre-

sta mas mihó.

Merkadonan sekundario, entre otro Aruba, Canada, Bélgika, Suisa, Reino Uní, Colombia i Brasil, a mantené nan partisipashon den merkado na luna di mei, komparabel ku luna di april.

Kontinuamente TCB ta evaluá e situashon di e industria di turismo pa medio di vigilá e indikadonan mas importante di prestashon i kompará esakinan ku e situashon di promé ku e pandemia.

Awor akí aña 2019 ta sirbi komo barometer pa midi turismo na nos isla.

Bishitantenan for di Merka a keda un promedio di 7 anochi i e bishitantenan for di Hulanda a keda un promedio di 14 anochi. Mas aleu mayoria turista merikano ta di edat mediano, 55+, miéntras mayoria turista hulandes ta 45+.


Na luna di april, 16 barku krusero a bishitá Boneiru ku en total 41.465 pasahero.

Popularidat ta relativo
P'esei un propio estilo
No solamente pa ta eksitoso
Sino sigur mas balioso

Brò KèS 93.5 FM
pokopoko pero sigur mas i mas hende ta ...
Skuch'è

Telefon/ WhatsApp +599 701 0935
www.radio935bonaire.com

City Shop N.V.
ta buska
- karpinté / meubelmonteur
Interesadonan por manda su CV na
info@cityshopbonaire.com
telefòn: 717-3666



Di habitantenan original di Boneiru

Harvard University ku estudio riba DNA

KRALENDIJK -- Den un esfuerso pa haña sa mas di e misterionan di e herensia riku di e isla, Jay Havis-er i Kendra Sirak, ta bai ehekutá un investigashon

pa loke ta trata orígen genético di e habitantenan original di Boneiru. E sientífikonan ta duna informashon tokante esaki, durante un evento di Terramar

Museum News Café.

Na 2020 Laboratorio Reich, huntu ku arkeológonan, antropólogonan i museo rònt mundu, a realisá un estudio di gran

skala riba orígen genético di poblashon original di Karibe. E ekspertonan a sekuensia genoma for di diferente islanan i diferente periodo. Nan a interpretá e data genético konhunto ku evidensia antropológiko i arkeológiko.


E resultadonan a duna bistanan nobo riba e orígen di e promé hendenan di Karibe. Dor di e evidensia genético akí, nan a demostrá ku herensia genético di hendenan Karibense promé di Columbus, ta presente ainda, ku ta kuadra ku historia oral di hopi hende, inkluyendo Boneriano.

Miéntas e investigashon akí a duna informashon nobo riba algun pregunta

duradero tokante pasado di Karibe, tambe a inspirá mas pregunta.

Laboratorio Reich awor ta trahando ku kolaboradonan i partisipantenan pa realisá un estudio kontinuashon ku lo reportá data nobo for di islanan i periodonan adishonal, kual lo enrikesé nos kompreshon di historia di populashon di Karibe.

Pa promé biá ta bai investigá e hendenan di Boneiru for di un perspektiva paleo-genómiko. Esaki lo yuda e sientífikonan pa kompandé mihó e hendenan ku a biba akí den pasado na e isla i kende nan legado ta biba ainda na Boneiru awe.



Ku e inisiativa 'Duna un man na desaroyo di bo barío'

Avanti a pasa pa di dos buelta 'Appeltje van Oranje'

KRALENDIJK -- Fundashon Antriol Avanti tin chens pa gana un 'Appeltje van Oranje', un premio otorgá pa Oranjefonds Hulanda. Avanti ta den kontienda pa gana e premio prestigioso 'Appeltjes van Oranje'. Ku e inisiativa 'Duna un man na desaroyo di bo barío', den barío di Antriol, e fundashon a logra pasa pa e di dos buelta. E inisiativa akí ta inklui tur hende den barío.

Pa medio di diferente aktivitat den barío, Fundashon Antriol Avanti ta traha pa logra hisa e sintimentu di orguyo di habitantenan di Antriol pa ku nan barío i ta stimulá

partisipashon di habitantenan na aktivitatnan. Esaki ta resultá den kontakto kontinuo di habitantenan ku otro i ta stimulá i reforsá kombibensia i union den barío.

Hasi barío limpi, kurso, siña historia di barío, lès di Papiamentu, aktivitat pa grandinan, pintura pa grandi i chikí, enkuentronan informativo, ta algun aktivitat kaminda hende ta topa otro i kompartí ku otro den barío.

Huntu ku habitantenan, Antriol a yega na su dia di barío, su bandera i himno. Esakinan a yuda elevá e sintimentu di orguyo tambe partisipashon

aktivo na aktivitatnan den barío. E aktivitatnan akí ta parti di loke e fundashon ta hasi pa konektá hende na otro.

Ku selebrashon di Dia di Antriol, e fundashon ta konektá hendenan di barío ku otro, pero tambe ku hendenan di otro bari- onan di Boneiru.

Pa Fundashon Antriol Avanti pasa pa e último buelta ku chens di bira un di e 10 nominadonan den Reino, ta invitá henter Boneiru pa duna sosten

pa medio di voto. A start ku votashon dia 31 mei i por vota te dia 10 yuni.

Pa vota pa e inisiativa 'Duna un man na desaroyo di bo barío', mester subi riba e página di Facebook di Fundashon Antriol Avanti, sigui instrukshon i vota.

Por vota dirèkt via e link <https://www.appeltjesvanoranje.nl/projecten/help-een-handje-mee-aan-de-ontwikkeling-van-jouw-wijk> i vota pa Fundashon

Antriol Avanti su inisiativa.

Den 24 ora ta risibí un mail di Oranjefonds ku ta pidi pa konfirmá e voto. Despues di konfirmá, e voto ta bira definitivo.

Fundashon Antriol Avanti ta spera ku e inisiativa akí lo motivá otro organisashonnan di barío di Boneiru pa bini ku inisiativanan similar asina pa sigui konektá hende ku otro.

Konmemorashon Ketí Kotí

KRALENDIJK -- Entrante promé di yuni por inskribí pa un stènt pa konmemorashon i selebrashon di Ketí Kotí, abolishon di katibu, na Boneiru. E aña akí e konmemorashon i selebrashon di Ketí Kotí ta tuma lugá den Parke Wilhelmmina.

Riba e dia akí ta rekordá pasado di

sklabitut i selebrá libertat. Tur persona ku ta interesá por bini na remarke pa un stènt pa bende kos durante e selebrashon. Ta trata akí di stènt pa bende kuminda, snèk, artesanía, bon kuné, wega pa mucha i hopi mas.

Entrante 1 di yuni por manda un meil, òf mensahe di telefòn pa por inskribí. Inskripshon ta sera 15 di yuni.

Organisashon i persona establesé na Boneiru, tin preferensia pa bini na remarke pa stènt. E pago mester tuma lugá riba e kuenta koriente di e fundashon Wi Na Wan. Despues di pago ta risibí aprobashon pa e petishon.

Pa mas informashon por bishitá e página di Facebook di Wi Na Wan.

Details Services BV

ta buska

personal pa limpiesa

- Edat 21+

Pa mas **informashon** por tuma kontakto ku number di telefòn **784-3234**

Pa **aplikashon** por pasa personal na **Kaya Atom # 19 Storage 24**

Selebrashon di 22 pa 25 di yüni

‘Pride Bonaire’ na kaminda

KRALENDIJK – Fundashon EQ Bonaire ku orguyo ta organisá pa promé biá e evento ‘Pride Bonaire’, di 22 pa 25 di yüni. E kuater dia di evento akí ta kontené un konferensia di kuido, beter pa spònsor, eksposishon di arte, kues públiko i un fiesta final tur afó. Tur hende ta bon biní.

‘Pride Bonaire’ ta un evento inklusivo kaminda

tur hende, sin distinsion di sekso, identidat, òf aseptashon seksual dirigí, ta bini huntu. E meta ta pa promové i aseptashon di e komunidad LGBTQI+.

‘Pride Bonaire’ ta habrí pa hende di tur edat i ta krea un ambiente di hospitalidat pa tur hende.

Fundashon EQ Bonaire ta organisá e promé ‘Pride Bonaire’ akí. EQ Bonaire ta un organ-

isashon chikitu non-profit ku ta hasi esfuerso pa mehorashon di e noshon i krea un espasio seif pa e komunidad LGBTQI+.

A kompilá pakete ku dekorashon di Pride pa empresanan lokal i partikular. Por kumpra tur artíkulo manera t-shirt, tas òf bandera spesial di ‘Pride Bonaire’, lòs via página di Facebook òf Instagram.

Tambe por sostené ‘Pride Bonaire’ finansieramente, òf mèldu komo boluntario. Tur hende ta bon biní pa selebrá ‘Pride’ huntu.

E eventonan ta kuminás 21 di yüni ku konferensia di kuido na Plaza Resort, di 22 pa 27 di yüni tin e eksposishon di arte ‘Nos tei, nos tei’, na Sobremesa, Kas di Arte.

Ta sigui dia 23 di yüni ku kues públiko na Hillside Resort, 24 di yüni fi-

esta ku aktuashon spesial for di Kòrsou na Happy's Snackbar i 25 di yüni mèrdia na bich i pisina na The Bonairian.

Sigui página di Facebook i Instagram pa mas informashon: Instagram: @pridebonaire, kontakto e-mail Info@pridebonaire.com donashon kuenta di banko MCB #41023004.

Huntu ta hasi e promé ‘Pride Bonaire’ un evento inolvidabel pa tur hende.

CanDo studio

Buskando figurante pa MAMADU

KRALENDIJK—E produkshon lokal MAMADU ta buska siudadanonan ku ke fungi komo figurante den e pelíkula. Ta buskando figurante di tur edat. Esnan interesá por mèldu entre 6 di yüni pa 30 di yüni. Por manda un mensahe na number di telefòn +599 700 2889.

Na momentu ku manda mensahe ku ta interesá ta bon pa pone aserka nòmber, edat, number di telefòn, meil adrès, i dlanan ku ta disponibel. Importante ta tambe pa agregá un foto di kara so i un otro foto di henter kurpa.

MAMADU ta un produkshon boneriano ku

tin tur potensial pa bira un éksito internashonal.

E ta konta historia di un wela ku ta risibi su ñetunan for di eksterior. E muchanan tin un mira diferente riba bida i MAMADU na su manera kómiko ta bai siña nan di kultura, norma i balornan boneriano.

Programanan di Bonaire.tv

TELBO kanal 70
Flamingo TV kanal 23

Djárason 07 yuni 2023

12.00 Herensia:	Marzel Felipe De Palm 2
13.00 Aki Boneiru:	Musik Venezuela na Rincon
14.40 Herensia Aruba:	Wilma Kuiperi
16.00 Herensia Korsou:	Valerio William
17.00 Aki Boneiru:	Ana Thodé
18.00 Herensia:	Jacintha Dorothea-Eusenía
19.00 BAPA:	Gerry F, Nayo Schoop & Kapel Ayo Aruba
20.00 Aktualidat:	Krus Kòrá
21.00 Aki Boneiru:	Robert Pikeri
22.00 Herensia Korsou:	Marcelo Urvina
23.00 BAPA:	Roland Colastica

Tur mèrdia 12’or ta kuminás un programashon nobo di 4 ora. E programashon aki ta ripití pa 24:00.



Bonaire.tv
Historia | Kultura | Naturalesa

KARGA AWA HIBA LAMAN!

“ma ken ku bebe di e awa ku Ami lo dun’é lo no haña set nunca, ma e awa ku Ami lo dun’é lo bira den djé un fuente di awa ku ta brota pa bida etèrno.” Juan 4:14(BS)

Bo ta hasiendo loke ta korekto i tòg no ta bai bon? Eduká bo yunan, bai sirbishi, lesa Beibel, hasi orashon, paga kuantanan na ora, hasi kontrol médiko regular; ma tòg ta parse ku ta pòrnada? Resultado di dòkter ta mustra preshon haltu, skol ta yama i bisa ku e yu no ta bai bon i riba dje kuenta di koriente ta bini haltu. I asina nos bida ta yen di disturbio, mesora pensamentunan straño ta kuminsá lur; ‘pakiko hasi tur loke mi ta hasi, tur esfuerso ta enbano tòg’. ‘Dios no ta wak, E no ta tene kuenta ku mi.’

Sabi sigur ku E tin tur kos bou di kontrol i sa kada detaye di tur hende, inkluyendo abo.

Sigui konfia, perseverá i keda konektá ku Dios. Loke bo hasi nunca ta pòrnada, apesar ku e por parse ku bo ta kargando awa hiba laman.

Bida kristian tin su prueba, reto i luchanan; ademas tin hopi kos ku nos no ta komprendé awor. E enemigu ke mira nos entregá i desanimá den situashon difísil. Ma laga nos sigui tuma awa for di e fuente di awa di bida ku ta Hesus i e Palabra di Dios. Sigui perseverá i ta konsistente pasobra E ta mira.

Perseverá den hasi bon - Galationan 6:9

No preokupá ma sigui konfia - Filipensenan 4:6

Dios Su tempu no ta nos tempu - Proverbionan 16:9

Gradisí Dios den tur situashon - 1 Tesalonisensenan 5:18

Kòrda Dios Su regalo di grasia - Efesionan 2:8

Hesus ta e fuente di awa di bida!

Gilda Beukenboom-Sintjago
Produkshon PGM

Durante konferensia anual di teknologia

Apple a presentá programa i teknologia nobo


KRALENDIJK— Djaluna 5 di yûni e kompania Apple tabatin presentashon di su produkto i programanan mas nobo riba tereno di teknologia. Apple's Worldwide Developers Conference (WWDC) a tuma lugá na 'Apple Park' na Cupertino, California. A presentá entre otro iOS 17 i macOS 14. Aki ta sigui algun e produkto i aplikashonan nobo di Apple.

Mac Studio

Durante di e presentashon, a presentá un Mac Studio nobo. Den término di diseño, e ta similar na e modelo anterior. E interior tambe ta parse di ta hopi meskos.

E inovashon mas grandi di Mac Studio ta e chip. E aparato ta bin ku e chip M2 Max. Ademas, Apple a presentá M2 Ultra, ku ta konsistí di chip 2 m2 Max. Esei ta hasié hopi mas lihé. E tin 192 GB di memoria i ta seis biaha mas lihé ku un Mac Intel. Apple ta duna atenshon spesial na e editornan di video. Esaki ta permití pa montahe sosodé hopi mas lihé. MAC Studio tin un preis di 1,999 dòler. Mac Pro ku Apple Silicon

Den e Mac Pro aki tin e Chip M2 Ultra. E ta tres biaha mas lihé ku Mac Pro.



Tambe e tin un memoria di 192 gb. Tambe e tin un CPU di 24 kernel i un GPU di 76 kernel. Aparentemente e ta parse su predecesor. E tin kuater Port Thunderbolt. Preis di e aparato ta 6,999 dòler.

iOS 17

Ku e iOS 17 por risibí yamada personalisá. Por agregá potrèt di e persona ku ta yama. Tambe tin karchi di kontakto nobo. Ademas por adaptá e pantaya di blòk i adaptá esaki na e persona ku e ta yamando. E posibilidatnan ta infinito, segun Apple.

Mensahe i 'FaceTime'

Apple a presentá tambe mensahe di bos bibu. Lo mira un transkripsyon bibu

na momentu ku e persona manda mensahe. Ademas, por skohe tambe pa kue telefòn na momentu ku ta risibiendo e mensahe.

'FaceTime' tambe ta risibí un aktualisashon. Na momentu ku yama un persona, i e no kontesta, tin e opshon graba un mensahe.

Ta bira mas fásil pa buska mensahe. Tambe tin un funshon nobo unda por bai mesora na e promé mensahe nobo di un kombersashon. Otro inovashon ta e asina yamá 'check-in'. Ku esaki amigunan i famianan por sa ki ora bo a yega kas. Di e manera aki e usuario por sintié poko mas seif.

E famoso stekernan di mensahe tambe lo risibí

un aktualisashon. Awor tur 'emoji' ta disponibel komo steker i tur kos ta mas organisá. Tambe lo ta mas fásil pa e usuario traha steker e mes.

'Airdrop'

AirDrop tin un karakterístika nobo ku yama 'NameDrop'. Esaki ta permití e usuario pa interkambiá informashon di kontakto ku otro aparato. Úniko kos ku e usuario mester hasi ta tene su telefòn serka di esun di un otro persona. Meskos ta konta pa interkambio di potrèt.

Tambe Tin SharePlay. Esaki ta hasi mas fásil pa skucha e mesun músika huntu òf wak video.

'Airpods'

AirPods ta haña un funshon di odio adishonal. Esaki ta permití 'AirPods' adaptá na e usuario su alrededor ambiente.

E ta filtra zonidonan ku por ta un distraishon, miéntras zonidonan importante manera pitu di outo òf bèl di basikel si ta zona mas skèrpi. Pa yega na esaki e kompania a hasi uzo di 'machine learning'.

Banda di esaki 'AirPods Pro' por regla nan mes outomátikamente ora e usuario topa ku un hende. Nan ta para e zonido outomátikamente ora ku e hende ke papia ku bo.

Diario

'Journal' ta un app nobo ku lo ta riba iPhone na final di e aña aki.

Ku esaki e usuario por pone tur su su rekuerdonan huntu. Esaki por ta tur kos, manera potrèt, lokashon i entrenamentu.

Tambe por agregá músika i esaki ta bira un totalidat personalisá di e usuario. Apple tambe ta yuda dor di duna sugerensia. Pensa riba esaki komo un diario digital riba bo iPhone.

Demanda haltu i ekspanshon parke solar

Kousa di interrupshon di koriente

KRALENDIJK--E temperaturanan ekstremo ku ta eksperensiendo hopi trepan e aña aki ta sòru pa un demanda haltu di tantu awa komo elektrisidat. Nan ta sòru tambe pa algun kontratempu operashonal den Water- en Energiebedrijf Bonaire, WEB. Na e momentunan aki tin bateri i parti di e kapasidat di produkshon di biento for di servisio pa motibu ku hustamente ta poniendo instalashonnan pa ekspanshon di kapasidat di e parke solar nobo. E

interrupshonnan di koriente di djaluna 5 di yûni tabata debí na e desaroyonan ariba menshoná. Banda di esei WEB a eksperensia 2 interrupshon separá riba e mesun kabel den área di servisio na Lagun i besindario.

Segun e pronóstiko di tempu ta spera ku e temperaturanan haltu lo kontinuá. Esaki lo nifiká mas uzo di awa i koriente. Kòmprèsernan di èrko mester traha mas duru pa por yega na temperaturanan abou.

Esaki ta kondusí na demanda haltu, pero tambe gastunan haltu pa e kon-

sumidó. Pa e motibu aki WEB ta duna tep pa tene kuenta ku e diferensia di temperatura pafó i paden ora ku ta ahustá e temperatura di èrko. E tep ta pa no hasi e diferensia entre e temperatura paden i esun pafó mas ku 10 grado.

Duna matanan awa parti anochi pa asina nan por absorbé e awa di un manera mas efisiente. Konsultá wèpsait i página di Facebook pa mas tep.

Eskoho inteligente awor ta nifiká faktura di koriente i awa mas abou fin di luna.



Jad's Motors B.V.

ta buska

- 3 (tres) mekániko

Interesadonan por manda su CV na
gm@jadmotorsbv.com

Kòmbersashon fruktífero ku Minister Weerwind

KRALENDIJK – Durante e bishita di trabou fin di luna di mei di e minister pa protekshon hurídiko, Franc Weerwind na Boneiru, despues di a sera konosí ku Gezaghebber Interino, Nolly Oleana, a ranka sali ku un kòmbersashon konstruktivo ku Kolegio Ehekutivo. E liña prinsipal den e kòmbersashon tabata posibel medidanan i solushonnan pa un mihó aksesu na derecho hurídiko, prevenshon di kriminalidat hubenil i BIBOB Karibe Hulandes.

Aksesu na derecho hurídiko ta pidi pa un facilidad di promé liña den forma di un lokèt hurídiko. E lokèt hurídiko ta sòru pa hendenan haña informashon na

un manera fásil alkansabel tokante nan derechonnan i obligashonnan, pero e ta un sitio tambe kaminda hendenan por akudí ku nan preguntanan, di manera ku nan no tin mester di aserká un abogado mesora.

A base di un proyekto di prueba na Saba, a akumulá informashon pa un senario básiko. Den e senario básiko akí a formulá den liñanan grandi kon e lokèt mester lusi, kua ta e funshonnan ku e mester tin i pa kua grupo di enfoke e ta intenshoná.

A tene kuenta tambe ku e nesidatnan i konteksto di e islanan i kua ta e ròl ku e lokèt hurídiko for di Hulanda por hunga den esaki.

E siguiente paso, ku

a deliberá tambe tokante di dje ku e minister, ta e elaborashon práktiko di e dunamentu di ayudo hurídiko di promé liña na Karibe Hulandes. Banda di legislashon i regulashon, protekshon hurídiko tambe ta un tópiko pa instansianan

ku tin relashon ku derecho hurídiko, manera konseho di tutela, Instituto Hudisial Karibe Hulandes, JICN i rehabilitashon sosial.

E minister a bishitá e instansianan akí i tambe e proyekto di prevenshon ‘Abo so ta disidí’, di Jong

Bonaire. Ku e konosementu ku e minister a optené na Boneiru, e ta bai kompartí ku Ministerio di Hustisia pa di e manera akí determiná pasonan di kontinuashon i traha riba e solushonnan deseá ku a keda palabrá pa Boneiru.



Aksidente ta kondusí na detenshon

KRALENDIJK -- Den oranan di mardugá djadumingu 4 di yùni, Polis a detené e hòmber di inisial L.A.L.N. di 31 aña di edat, en konekshon ku manehá bou di influensia.

E sospechoso tabata envolví den un aksidente riba Kaya Pos di Amor, di kua el a bai dal den kurá di un kas. Despues di un kontròl mas aleu a detené i hib’é Warda di Polis pa un anáalisis di rosea.

Kontròl en konekshon ladronisia di skuter

KRALENDIJK -- Resientemente Kuerpo Polisial Karibe Hulandes, KPCN, a haña diferente keho en konekshon ku ladronisia di skuter.

Pa e motibu akí djaluna 5 di yùni, patruyanan di polis a kontrolá diferente skuter i a hasi un detenshon relashoná ku indikashon di

inkubrimentu i pa violashon di lei di identifikashon BES.

Ta trata di un shofùr di inisial L.J.P.G. di 17 aña di edat, kende tabata kore riba un skuter probablemente hòrtá. Mas aleu a dun’é un prosèsferbal pa manehá sin reibeweis i sin seguro bálido. Ta investigando e kaso.

Segun CEO di IATA

‘Schiphol ta e pió aeropuerto na mundu’

KRALENDIJK/IS-TANBUL-- Willie Walsh kende ta CEO di International Air Transport Association, IATA, djaluna 5 di yùni a bolbe bòfta aeropuerto Schiphol.

Segun Walsh, ta insolito ku e aeropuerto ta keda para riba oumento di tarifa na e aeropuerto.

Walsh a kalifiká Schiphol komo un di e pió aeroportuonan na mundu.

Tambe el a ekspresá su desaprobashon pa e proposishon di gobièrnu pa baha kantidat di vuelonan pa i for di e aeropuerto.



Mensaje de la Virgen Maria Reina de La Paz desde Medjugorje 25 de MAYO de 2023

“Queridos hijos, los invito a ir a la naturaleza y a orar para que el Altísimo hable a su corazón y sientan el poder del Espíritu Santo, a fin de que puedan testimoniar el amor que Dios tiene por cada criatura. Estoy con ustedes e intercedo por ustedes.

¡Gracias por haber respondido mi llamado!” 05/25

Siklismo tin benefisio grandi pa salú

KRALENDIJK

-- Rekonosiendo e singularidat i versatilidat di baiskel, ku mas di dos siglo di uso i ku alabes ta konstituí un medio di transporte sostenibel, simpel, ekonómiko, konfiabel, limpi i ekológiko ku ta kontribuí na un mihó medio ambiente i mehorashon di salú, Asamblea General di Nashonnan Uní, na 2018 mediante Resolushon A/RES/72/272, a deklará 3 di yüni komo Dia Mundial di Baiskel. E dia akí ta enkurashá partnernan i personanan interesá, pa enfatisá i avansá e uso di baiskel komo un medio pa promové desaroyo sostenibel, reforsá edukashon, inkluy-



endo edukashon físico pa mucha i hóben, promové salú, prevení malesa, promové toleransia, entendimentu i respèt mutuo, fasilitando inklushon sosial i un kultura di pas. Asam-

blea General di Nashonnan Uní ta balará positivamente e organisashon di marcha di baiskel pa fortalés salú físico, mental i bienestar i desaroyá asina un kultura di baiskel den sosiedat.

Aktivitat físico

Aktivitat físico di un intensidat moderá, manera kanamentu, siklismo, òf práktika di deporte, tin benefisio grandi pa salú. Na tur edat e benefisionan di ta aktivo físicamente ta mas grandi ku e posibel daño kousá por ehèmpel dor di aksidente. Dor di bira mas aktivo durante e dia den forma relativamente simpel, hende lo por logra e nivelnan di aktivitat físico rekomendá fásilmente.

Segun Organisashon Mundial di Salú, WHO, dor di ofresé un infrastrukutura sigur pa aktivitatnan físico, manera kanamentu i kore baiskel, ta e kaminda pa alkansá un mayor ekuidat den materia di salú. Pa e sektornan urbano mas pover, na unda no por permití ekonómikamente tin un vehíkulo propio, bai na pia òf kore baiskel, por konvertí den un forma di transporte i na e mesun momento por redusí e riesgo di kontraé malesa kardiovaskular, aksidente serebro vaskular, sierto tipo di kanser, diabétis i asta morto. Konsekuentemente, transporte aktivo mehorá, kana, uso di baiskel i transporte públiko, no solamente ta saludabel, e tambe ta ekuitativo i ta mas efektivu pa loke ta gastunan di transporte. Satisfasé e nesesidatnan di siklista i peaton ta sigui ta, por lo tantu, krusial pa solushoná problema di mobilitat di siudatnan, pa mitigá e oumento di emishon di gasnan ku ta kousa e efekto invernadero debí na kresementu di e poblashon i pa mehora e kalidat di aire i seguridat di tráfiiko.

Desaroyo sostenibel

Dia Mundial di Baiskel ta pone atenshon riba e benefisionan di usa baiskel, un medio di transporte simpel, ekonómiko, limpi i ambientalmente sostenibel. E baiskel ta kontribuí na un aire mas limpi i ménos

kongeshon den tráfiiko i ta hasi edukashon, kuido di salú i otro servisio sosial bira mas aksesibel pa e partinan mas vulnerabel den e poblashon.

Un sistema di transporte sostenibel ku ta promové kresementu ekonómiko, ta redusí desigualdat i ta reforsá e lucha kontra kambio di klima i ta fundamental pa aliansa e ophetivonan di desaroyo sostenibel, SDG. Segun Global Action Plan on Physical Activity 2018-2030 di WHO, aktivitatnan físico tin benefisio multiplikadó pa salú, ekonomia i sosiedat i invertí den aksionnan di maneho polítiko pa oumento aktivitat físico, por kontribuí na logra kumpli ku e ophetivonan di desaroyo sostenibel.

Tin múltiple manera direkto i indirekto, mediante kua maneho ku ta promové aktivitat físico atraves di kanamentu, siklismo, deporte, rekreashon aktivo i hungamentu, por sostené no ménos ku 13 di e SDGnan. Na 2022, Asamblea General di Nashonnan Uní a adoptá resolushon A/RES/76/255, 'Integration of mainstream bicycling into public transportation systems for sustainable development'.

E resolushon ta enfatisá e nesesidat pa integrá baiskel komo medio di transporte saludabel, ekológiko i kontribuidó na SDG den e sistema di transporte públiko, na nivel urbano i rural i den planifikashon urbano, pèrmitiendo un integrashon di infrastrukutura pa siklismo den e infrastrukutura resiliente di mobilitat en general. Inkorporando alabes e mehorashon di seguridat di tráfiiko pa peaton i siklista i promoviendo e uso di baiskel komo medio di transporte den komersio, turismo i siklismo, deporte i pa kombati i redusí malesanan króniko no contagioso.

Huntu ku otro organisashonnan

AFBW ta kere huntu ta mas fuerte

KRALENDIJK -- E reunion di partidonan di kuido ta un kontinuashon di e konferensha 'Huntu nos ta mas fuerte', ku a tuma lugá na yüli na St. Maarten. E organisashonnan di kuido ta eksperensiendo un preshon kresiendo pa falta di personal. Esaki tin impakto riba kalidat i kontinuidat di kuido i ta suprayá e urgensia di tuma medida konhunto.

E harmonisashon di kondishonnan laboral primario entre e sinku organisashonnan di kuido, ta duna un impulso, hasien-

do trabou na Saba i Sint Eustatius mas atraktivo i ta kontrarestá konkurensia entre partidonan. Partidonan ta hasi esaki basá riba un ambishon konhunto.

E akuerdo di koalishon di Gobièrnu 2021-2025 'Un futuro mihó pa henter Reino', ta duna partidonan un punto di salida importante. Igualdat ta forma parti di esaki, inkluso e esfuerso pa hasi Boneiru, Saba i Sint Eustatius, un parti igual di Hulanda.

Den e konteksto ei, e kontrato kolektivo di kuido BES, mester kontribuí spe-

sífikamente na e kapasidat pa sigui brinda kuido di kalidat haltu na e habitantenan di e islanan akí.

Relashoná ku e nivel di kondishonnan di trabou, partidonan ta enfoká riba e kontratonan kolektivo manera na Europa Hulandes.

Sindikatonan sigur ta di e mesun pensamentu ku salarionan ku ta paga den e sektor di kuido na Europa Hulandes, mester bira salarionan ku ta paga tambe pa e personal den salubridat na islanan BES.



Cherel Kwidama, Norwin Willem, Sharella Wanga-Francees i Mario Francees.

Nuebe aña Parke Tului

KRALENDIJK — Djaluna 5 di yùni ta nuebe aña pasá ku a e inougurá Parke Tului Domacassé, na Playa Pabou.

Un Parke ku ta karga su nòmber, pa e motibu di konservashon di e pida tereno ku tabata konosí komo kas

di dòkter.

Robert Domacassé, ru- man di defuntu Tului, ta redaktá: “Na momentu ku a disidí di deshasí di kas di dòkter, tabata konosí ku polítikonan e invershonista a bini huntu pa yega na un akuerdo pa bende i desa-

royá e pida tereno akí. Thur, komo polítiko, a para duru i a bin ku un moshon den Konseho Insular pa para e plannan ku a haña sosten unanimamente.”

Esei a pone awe e parke ta karga su nòmber i ta un di e parkenan mas bishitá,

usá i frekuentá.

Nuebe aña pasá Gobièr- nu na honor di Tului, a hon-

ra e parke na su nòmber, pa tur loke el a hasi pa e isla di Boneiru.



WATER- EN
ENERGIEBEDRIJF
BONAIRE

DESTAHO PÚBLIKO Rekonstrukshon ofisina Hato di WEB Boneiru



INFORMASHON DI FONDO

Water- en Energiebedrijf Bonaire (WEB) tin e proposito pa renobá e tayér, situá riba e tereno na Hato i kombertí esaki den un edifisio ku kantor pa asina e diferente business-units, parsialmente òf completo, por keda akomodá na un lokalidat. Pa otorgashon di e proyekto WEB ta organisá un Destaho públiko.

E inisio di e proyekto ta planiá pa e di 3 kuartal di 2023 i mester ta finalisá denter di 12 luna.

E ENKARGO

Realisashon di un edifisio di kantor renobá di aproksimadamente 600 BVO (superfisie di flur brutu) ku mester brinda mas espasio pa lugánan di trabou i ku posibilidat pa lugánan di trabou flèksibel. E edifisio mester ta un ehèmpel pa loke ta trata sostenibilidad: uso konsiente di materialnan i solushonnan inovativo pa hasi e edifisio energetikamente mas efisiente. Tambe mester konstruí rutanen seif pa kana riba e tereno.

E magnitud di e enkargo ta inkluí realisashon ingeneria arkitektóniko i makinaría inkluso instalashonnan elektriko.

KIKO WEB TA BUSKANDO?

E intenshon ta pa WEB kontratá un kontratista (prinsipal) pa ehekutá e trabounan aki. Pa loke ta trata esaki WEB ta organisá un destaho públiko.

BO TIN INTERES?

Pa mas detaye di e proyekto, informashon di e prosedura di kontratashon i registrashon por manda un meil na: procurement@webbonaire.com. Despues lo bo risibí e dokumentonan di destaho. Un supliká pa mustra interes pa mas tardá **14 yùni pa 11 or** (ora lokal na Boneiru).

TOKANTE WEB BONAIRE

Water- en Energiebedrijf Bonaire N.V. (WEB) a keda fundá na 1963 i e ta propiedat di Entidat Públiko Boneiru. Komo kompania eksklusivo di utilidat múltiple WEB ta responsabel pa entrega di awa di bebe i koriente duradero, konfiabel i pagabel na mas di 20.000 kas, kompania i organisashon riba e isla di Boneiru. For di 2013 a ekspandé e servisionan di WEB pa rekohé i purifiká awa di berput i entrega di awa di irigashon. WEB ta invertí den energia for di fuente nan renobabel i for di 2021 ta produsí awa di bebe. E team di WEB ta konsistí na e momentunan aki di 150 empleado.

let's do it
together



Sosten pa kunukero

KRALENDIJK -- E dianan akí Diputado Hen- nyson Thielman a tuma tempu pa bishitá diferente kunukero di Rincon i Méxi- co. E ta hasi esaki pa sku- cha di e diferente retonan ku kunukeronan ta topa.

Di e forma aki komo

gobièrnu ta duna sosten na e kunukeronan pa asina for- tifiká e sektor di kunuku.

Diputado Thielman ta mira sigur agrikultura komo un sektor importante pa desaroyo di nos isla. Komo gobièrnu ke sostené e hendenan den esaki.



Junior ranger aspirante aktivo

E junior ranger aspirante i e tim di boluntario, tabata aktivo durante e dia habrí na Parke Nashonal Washington-Slagbaai djadumingu, selebrando 54 aña di eksistensia. Tabatin un skina pa mucha, kaminda nan por a pinta kara, pinta riba palu, riba mura, klùr i hunga. Tabata un dia yen di goso, loke por apresia riba e fotonan.



UN INVITASHON DI FUHIKUBO & SKAL

PRESENTASHON DI BUKI

DJABIERNE 16 YÜNI, 2023

6:30 - 9:00PM

SKAL MUSEO BONEIRU

KAYA J. N. E. CRAANE 34



Yabi di pasado, porta pa futuro



Dresscode: Casual

Luganan ta limitá!

Inskribi awor:

seferina.saragoza@bonairegov.com



Payroll Pro

HRM

www.payrollprohrm.com



The most complete payroll
and HR software in the
Caribbean!

Download the mobile app!



Mama Lu anfitrión di Anochi ku luna yen

Lourdes Juan Pedro, mihó konosí komo Mama Lu, tabata anfitrión di Anochi ku luna yen djasabra ku a pasa. Aki algun foto di e evento ku ta ripití tur luna riba dia di luna yen.



WHO IS THE NEXT
K KOOYMAN
**HANDY
MAN?**

Join us for the final event
and witness the live battle
between the 5 finalists.

JUNE 10TH, 2023
LIVE BATTLE

8:30 am - 4 pm
Kooyman

Powered by
Makita

Visit kooymanbv.com for more information.

Building Depot kasi kla

Konstrukshon di Building Depot ta kasi kla. Durante fin di siman por a nota ku a pone e diseño ku nòmber na e entrada prinsipal i pronto ta bai tin apertura. E edifisio ta keda djis patras di e anterior Consales.



Radio Flamingo 97.1 FM
June 8, 2023 12:06 PM


Studiantenan di GROA a duna presentashon final

KRALENDIJK -- Djasabra studiantenan di Grupo di Opinion Aktivo (GROA), a duna nan presentashon final, kua tabata enfoká riba nan sektor la-boral. A presentá tokante horeca, konstrukshon i atministrashon. E públiko tabata konsistí di algun miembro di direktiva di ROA CN, gerente i empleadonan di ROA CN, representantenan di MBO di SGB i Fundashon FORM-A, guia di stazje di Fundashon Mariadal i coach

Flora Wijnand.

Mester bisa ku kada un di e studiantenan a duna un presentashon tremendo, den kua nan a duna nan opinion balioso tokante nan sektor. Ta bai uso e informashon akí pa hisa kalidat di stazje i guia di praktiká di MBO.

Un pabien ta bai na kada estudiante ku nan logro i di parti ROA CN ta yama danki pa nan aporte i nan esfuerso durante henter e aña eskolar.



DEN PASONAN DI BÒI

E rúbrika aki no ta kos di tur dia den BONERIANO. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den sali-mentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ripitishon.

Un dje personanan ku al-
gun aña pasá a bin resultá
den mi sírkulo di amigunan
mas será ta Leon Bérénos.
E tin 78 aña di edat, pero
ta move manera un hende
ku tin ADHD. Un energia
enorme ta brota, asta por
bisa 'eksplotá', for di e
hòmber aki. E ta manera
'The Roadrunner', e figura
den seri di 'cartoons' ku su

gritu 'beep beep'. M'a bini
den kontakto ku Leon via
Dufi Kock, otro historiadó di
Aruba. Leon ta biba na San
Nicolas, Aruba, kaminda
kasi diariamente e ta or-
ganisá kaminata edukativo
pa públiko. E ta un eksper-
to den historia di San Nico-
las, barío na unda hopi
boneriano a biba ántes,
mayoria trahando pa Lago

Oil & Transport Company.

Desde ku m'a konosé Leon
Bérénos aki nos a traha
basta programa di televi-
shon huntú, kubriendo hopi
tópiko di Aruba en general
i San Nicolas en partiku-
lar. Durante mi estadia na
Aruba siman pasá m'a topa
na vários okashon ku Leon.
Nos a traha tambe dos pro-


grama, esta unu tokante e
santana di kachó den área
di Seru Colorado i e otro
tokante historia di prosti-
tushon den San Nicolas.

Mi a regalá Leon e buki
tokante salu i historia ko-
lonial ku Cees Luckhart ku
mi a skirbi. E meresé esaki,
konsiderando nos amistad.
Na momentu ku mi a dun'é
mi no a haña oportunidat
pa firma esaki. Mi a keda
pa hasi esaki despues. Dos
dia despues, ora ku m'a
kaba tene un presentashon
na biblioteca di Aruba, a
presentá mi dilanti un hòm-
ber den trahe afrikano ku
un buki den su man, pidi-
endo pa mi firma esaki p'e.
M'a puntra na nòmber di
ken mi mester pone e de-
dikatorio. E hòmber ta kon-
testá: "Leon Bérénos."


Tabata inkeibel. Mi a haña
un bèrgwensa enorme.

Mi no por a rekonosé mi
amigu. E trahe i pèchi
afrikano a transformá e
hòmber kompletamente.
M'a konformá mi mes ku
e echo ku no ta mi so no a
rekonos'é. Mas hende no
a rekonosé Bérénos den
su vestuario afrikano. Asi-
na bo ta ripará kon paña
por transformá hende.

Mientrastantu mi ta bèk
na kas ku hopi ko'i hasi.
Kuminsando ayera mèr-
dia ku un rekorido ku
huntú otro sekretario di
estado hulandes i su de-
legashon. Anochi kurso
na nivel 2 di historia i kul-
tura. Ta promé bes ku mi
ta bai duna e kurso aki,
pa kua tin hopi interes.
Interes ta asina grandi
te asta ku mester a para
inskrishon i planeá un
segundo asina ku esaki
kaba. Basta trabou pues.



Entrevistando Leon, den trahe normal, siman pasá.





Asina aki Leon Bérénos a presentá durante mi pre-
sentashon djaweps anochi na Biblioteca Nacional
Aruba.

MONCHI & TONCHI

Mi ta bai pone un eksigen-
sia nobo. No invitá mi bai
niun kaminda ku no tin èrko

Awèl si, ta mané Papa Dios a
hinka ABC den fòrnu i lubidá.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòl Antoin
786-6818
Aviso
avisobon@gmail.com

25 aña saserdotal di pader

“Marc” Marcus Hendrikus Johannes Hooijschuur

25 aña saserdotal di pader “Marc” Marcus Hendrikus Johannes Hooijschuur ta djamars 7 yuni 2023 pero ku selebrá esaki ljadumingu 4 di yuni 2023 na 10 or mainta na Antriol

Drs. Marcus Hendrikus Johannes Hooijschuur a nase na 11 di febrüari 1972 na Dosterhout, Hulanda.

El a baha na skol HAVO “Schöndeln” di e siudat Roermond(L), final ku a pasa eksamen na 1990

E tabata den e Seminario “Rolduc”, diósesis di Roermond di 1990 te ku 1997

Tabata el a ordená komo liákono dia 13 sèptèmber 1997, den e Iglesia Abbey di “Rolduc” den Kerkrade.

Ordenashon komo saserdotal dia 6 di yuni 1998, den e Catedral di Saint Christoph len Roermond.



Pader “Marc” Marcus Hendrikus Johannes Hooijschuur

El a selebrá su promé Santu Misa dia 7 yuni 1998 den e di Nos Lady Munster den Roermond.

El a traha komo kapelan den e parokianan di Saint Servatius i Saint Anna/Lambertus den Maastricht di Sèptèmber 1997 te Sèptèmber 2004.

El a studia den Roma di Òktober 2004 pa Yüli 2006

i el optené su gradashon di e Bachier den pastoral teologia den e instituto “Redemptor Hominis” (Pontifical Lateran University).

El a katisashi den Roma den 2006/2007 komo estudiante invitá na e Salesian Pontifikal Universidat.

E ta traha komo pastor di parokia for di 2007 te ku 2015 den e parokianonan di Heel i Beegden i e tabata un asistente den e cluster di parokianan yamá “Emmaus” (parokianan di Thorn, Wessem, Neeritter, Ittervoort, Hunsel, Ell).

E ta traha for di 2007 te 2015 tambe komo responsabel pa e departamentu di katisashi di e diósesis di Roermond.

El a optené su promé gra-



do di kualifikashon di siñansa na e Tilburg School di Katólíko Teológiko (TST) na 2014. E ta traha komo pastor di parokia for di 2015 te ku 2021 (Yanüari) den e parokia di “Santa Familia” den Kòrsou di e diósesis di Willemstad.

E ta traha komo pastor di parokia for di 2021 (Febrüari)

di “La Birgen di Coromoto” na Bonaire den e diósesis di Willemstad.

E ta traha for di 2021 komo kapelan di prison den JICN (Judicial Organization Caribbean Netherlands).

Nos di Página Katólíko ta deseá un pabien danki i mucho hopi pabien mas. Bendishon.



Kiko ta Santísima Trinidad?:

Sprikashon di kada un di e tres personanan

Santísima Trinidad ta e mesun Dios, Tata, Yu i Spiritu Santu: Tres persona distinto i un solo Dios berdadero.

Esaki ta nifiká ku e Tata ta Dios, e Yu ta Dios, i Spiritu Santu ta Dios, pero e Tata no ta e Yu i Spiritu Santu no ta e Tata ni ta e Yu.

Ke men ku **realmente e tres personanan di Santísima Trinidad ta distinto**, ounke nan ta un solo Dios berdadero.

Trinidad ta dógma di fe den Iglesia katólíko. E dógma aki a ser anunsiá den e konsilionan ekuméniko ku nan a selebrá den oriente.

E promé persona di Santísima Trinidad ta e Tata, kende su karakterístika ta ku e no a ser engendrá ni kreá pa medio di ningun hende ni nada.

E di dos persona ta e Yu, ku tampoko ta kreá, pero si ta engendrá di forma eterno pa medio di e Tata.

E di tres persona di Santísima Trinidad ta Spiritu Santu, ku meskos ku e promé persona no ta kreá ni engendrá, pues e ta prosedé di forma eterno di Tata i Yu.

Ora a tene e promé **Konsilio di Constantinopla** na aña 381 ta definí e dógma katólíko di Trinidad, kaminda ta splika ku e tres personanan ta kompletamente distinto, pero ku nan ta un solo Dios berdadero. E dógma aki ta yamá dógma di fe, ya ku no opstante e ta simpel pa splika i e frasenan ta sumamente komprendibel, e no ta fásil aksesibel pa mente humano.

Pa t’asina ku e katólikonan por komprondé e santísima Trinidad un poko mihó, teologonan manera **Agustín di Hipona** a splika e misterio aki pa medio di komparashonnan.

Di e forma aki Agustín a kompará e Trinidad ku **mente**, **pensamentu** i **amor**, komparando **Dios** ku **mente**, **pensamentu** ku ta nase di dje ku **Hesus**, i **amor** ku ta uni nan ku **Spiritu Santu**.



Piramid Top Fitness tin e baiskelnan di spinning di mas inovativo pa bo kima kalaría, mehora bo kondishon i kapasidat di bo kurason.

Spinning ta mehorá muskulo di pia, brasa i hasta baha bo barika. Koredonan di baiskel por train spinning pa mehorá nan prestashon den kompetensha.

Bo por train spinning virtual for di mainta 5or te anochi 9’or nonstop i ku trainer atardi 5or. Awor ku un siman di spinning gratis pa bo tèst nos baiskelnan i trainernan.

Spinning inkluso fitness ta kosta Naf. 95,00 pa luna.
Inskripshon: Naf. 15,00 i ku kada pago bo tin derecho riba un karchi di deskuento ku un balar di Naf. 25,00

Piramid Top Wellness Center ta situa na Menegrandeweg 2, huki Rio Canarioweg, Tel. 869-7733 of app 520-8544

HULANDA

Outo ta drenta tienda

EINDHOVEN – Shofùr di un outo djadumingu anochi a drenta ku su outo den un filial di Action na Eindhoven. E shofùr a resultá heridá, Omroep Brabant ta skirbi.

Banda di kuartu pasá di unu, e outo a kore drenta e tienda. E dañu den e filial di Actoin ta grandi. E shofùr a kore dal un bòrchi di trá-fiko i despues resultá den e

tienda.

Polis i ambulans tabata lihé presente komo ku e alarma di ladronisia a aktivá.

Despues di tèst di blas, a detené e shofùr. Probablemente e tabata bou di influencia di alkohòl. No ta hasi menshon di seriedat di su leshonnan.

Djaluna mainta e tienda a habri normalmente.



Eksploshon na coffeeshop

DEN HAAG – Djadumingu anochi na Den Haag a tuma lugá un eksploshon na un coffeeshop. Segun polis, ningun persona a resultá heridá.

E eksploshon a tuma lugá banda di 2'or den Bilderdijkstraat, na rant di

e sentro.

E porta dilanti di e edifisio a keda destruí dor di e eksploshon.

Habitantenan a lanta spantá dor di e eksploshon. Polis ta hasiendo investigashon i ta pidi tes-tigu pa mèldu nan mes.



Despues di choke ku trein

Entregadó di pizza ta muri

EMMEN – Un entregadó di pizza di 17 aña a pèrdè su bida momentu ku el a dal kontra un trein ku su skuter. E hóben di Emmen banda di kuartu pasa di sinku a dal den e trein.

Esaki a tuma lugá riba un traspaso di spor na

Kerkhoflaan, nèt pariba di e sentro. E hóben a muri na e sitio debí na su leshonnan.

Polis ta investigando kon e aksidente por a tuma lugá. Debí na e aksidente, trá-fiko di trein a keda paralisá na inisio di e anochi pa un ratu.



Ku impuesto di dividendo

Hulandes arestá riba sospecho di froude

HULANDA – Pa promé biá a detené un hulandes den un investigashon internashonal grandi pa froude di dividendo. Ministerio Públiko ta sospechá e hòmer di hasi entrega di impuesto di dividendo inkorekto konsientemente. P'esei e servisio di impuesto a pèrdè mas di kuater mion euro.

E servisio di inteligen-sia fiskal i rastreo, FIOD. A hasi entrada hudisial den kas di e hòmer. Tambe a buska den e kantor di su

konsehero di impuesto.

Dividendo ta un kompensashon di ganashi di e empresa na su akshonistanan. Ta paga Gobièrnu impuesto riba e dividendo. Serka froude ta bende akshonnan temporal ku eks-terior pa asina por pidi e impuesto pagá na Hulanda bèk. E hòmer detené lo a hasi uso di esaki di partner-nan na Canada i Dubai.

Segun Follow the Money, ta trata di e èks bankero Frank V. Anteriormente a sentensia un bankero bri-

tánico pa e uso di e método akí. E mester a paga 1,7 miar dòler, plùs 5 porshento bèk na Dinamarka.

E detenshon di e hulandes ta parti di un koperashon grandi internashonal. Tambe a detené un persona na Finlandia. Nan dos lo a estafá mas di 17 mion euro. Na Alemania tambe ta sospechá nan di estafa.

Segun Ministerio Públiko, na Hulanda ainda tin dos otro investigashon penal di e tipo akí.



STATIA/SABA/ST. MAARTEN

Konseho Insular ku bishita di trabou na Hulanda

THE BOTTOM – Konseho Insular a kuminsá un bishita di trabou di dos siman djaluna 5 di yùni na Hulanda. E programa ta hopi diverso i ta hiba e miembronan na reunionnan na Den Haag i Amsterdam, atendiendo un kongreso na Groningen i bishitá Schiermonnikoog. Tur sinku miembro di Konseho Insu-



lar, Vito Charles, Rolando Wilson, Elsa Peterson, Saskia Matthew i Hemmie van Xanten, ta forma parti di e delegashon, huntu ku Griffier Akilah Levenstone i konsehero legal interino Devi van Groningen. E parti ofisial di e programa a kuminsá na Amsterdam djaluna 5 di yùni ku un reunion ku representantenan di e instituto nashonal di pasado di sklabilitut hulandes, pa papia tokante e aña di konmemorashon di sklabilitut dia promé di yùli i e despensa di parti Gobièrnu Hulandes. Mesun djaluna, e delegashon a topa ku e kordinadó di e organisashon di diversidat i inklushon di e munisipio Amsterdam i a papia to-

kante diversidat i inklushon dentro di e organisashon di gobièrnu i kon pa tuma diversidat i inklushon na konsiderashon den tumamentu di desishon.

E museo nashonal di sklabilitut na Amsterdam, tambe tabata riba agènda Djamars 6 di yùni e delegashon tin reunion ku e ministerio di asuntunan interior i relashon di Reino, BZK, na Den Haag. Tambe djamars e delegashon tin reunion ku vise presidente di konseho di estado.

Asina e delegashon ta kontinuá su bishita di trabou e dianan ku ta bini ku diferente enkuentro i bishita, na entre otro ministerionan di EZK i BZK i Tweede Kamer.

Selebrashon Dia di Piská

Na Sint Maarten ta celebrá Dia di Piská i esei a tuma lugá djadumingu. Promé Minister Silveria Jacobs, a partisipá aktivamente na e selebrashon. E mandatario a felisitá e organisadónan i e departamentu di kultura, pa semper bini ku inovashon pa hasi e dia spesial akí unu úniko.



Pa personanan ku desabilidadat

Mester organisá dia di estudio pa solushoná problema

WILLEMSTAD,- Parlamentario pa frakshon di MFK, Ramón Yung djasa-bra último durante un enkuentro ku e grupo di preshon di mayornan ku un yu ku desabilidadat “ARISE” a organisá na SGR-Groep na Emmastad, a proponé pa organisá un dia di studio huntu ku “ARISE” i demas ‘stake-holdernan’. Meta ta pa hasi un inventarisashon profundo riba e diferente problema i nesesidatnan pa personanan ku un desabilidadat den komunidad.

Parlamentario pa frakshon di MFK, Ramón Yung na algun okashon kaba a reuní ku e grupo di preshon “ARISE” i tambe ku aktual minister di salubridat, Javier Sylvania. Durante dicho enkuentronan, mayornan

ku yunan ku desabilidadat a mostra riba e nesesidat ku tin pa entre otro fisioterapia, bibienda adaptá pa personanan ku desabilidadat, mas kapasidat pa akohida di dia, mas spesialisashon pa personanan ku mester di kuido i guia mas avansá i spesialisá, “rolstul” adaptá i na midí di e persona i asina tin mil i un problema òf preokupashon ku e mayornan ta hasi menshon di dje.

Tin kasonan kompleho, kaminda mester tene kuenta ku tantu e aspekto sosial, pero tambe e aspekto médiko i den sierto kaso mester tene kuenta tambe asta ku e parti sikiátriko. Tin mayor ku pa mas di 13 aña kaba ta riba un supuesto lista di espera, p’asina mira di ki manera por aliviá

nan ku e situashon kual diamante nan ta konfrontá.

Tin mayor ku ya a yega na un edat grandi i ta teme ku na momento ku nan fayesé, nan yu lo resultá sin mas riba kaya, pasó no tin niun kaminda ku nan por pone e yu i ku tin e garantia ku e ta risibí e kuido nesessario. SGR-Groep ta yen i no tin espasio pa mas kliente, miéntras e lista di espera ta unu basta largu.

Mayornan a indiká alabes ku entrante 1 di yúni 2023 a introdusí un “bij betaling” ora ku nan bai buska “pampers”, siendo ku ya nan gastunan pa loke ta trata entre otro higiénia a subi drástikamente despues dje pandemia di COVID.

Mirando ku e problema i preokupashonnan serka

mayornan ku un yu ku desabilidadat ta grandi, parlamentario pa frakshon di MFK, Ramón Yung a proponé durante e enkuentro pa organisá un “Dia di studio” riba e tema aki, kaminda e persona ku desabilidadat i nan mayornan ta pará sentral. Huntu ku tur “stakeholder” mester hasi un inventarisashon dje situashon, pa huntu yega na solushon i alivio pa e grupo spesial aki. Mayornan di “ARISE” ta sostené e proposishon. Parlamentario Ramón Yung ya a kuminsá tuma e pasonan nesessario pa pronto por organisá e Dia di studio aki.

Alabes, lo hasi uso dje oportunidat pa mira di ki forma por kuminsá akumulá datonan ofisial den e sektor aki, komokiera ku

na e momentonan aki no ta dispone di tur informashon i sifra dje kantidat di siudadano ku un desabilidadat ku ta biba na kas.

Na e momento aki, tin tur persona ku un desabilidadat registrá huntu. Pero tin siudadano ku a nase ku un desabilidadat i tin siudadano ku debí na un aksidente òf sirkumstansia di malesa ku a keda desabilitá. Parlamentario pa frakshon di MFK, Ramón Yung ta kontentu i ta aploudí e posishon asumí pa Minister Sylvania, esta pa dediká atenshon na e grupo di siudadanopnan spesial aki, sperando ku pronto huntu ku e grupo “ARISE” lo por yega na adaptashon i òf mehorashon dje kalidat di bida dje grupo di siudadanonan aki.

MEO i FKUP a firma akuerdo

WILLEMSTAD – Dia 26 di mei último a tuma lugá firmamentu di un akuerdo di koperashon entre Ministerio pa Desaroyo Ekonómiko (MEO) i Federashon Koperativanan Uní di Produkshon (FKUP).

A funda na aña 2019 i un di su promé akshonnan

tabata pa sera konosí di forma ofisial ku MEO. Un di MEO su tareanan komo ministerio ta pa stimulá desaroyo di koperativa na Kòrsou.

For di 2019 MEO ta duna koperashon i sosten na FKUP den diferente forma. Asina por menshoná ku na

2020 durante di pandemia, MEO a organisá un kurso di koperativa di forma ku e direktiva di FKUP por a alsa nan konosementu.

Pa esaki MEO a haña koperashon di un dosente versá riba tereno di koperativa for di Paraguay, sr. Florencio Nuñez, ku a duna

e kurso virtual 2 biaha pa siman durante un periodo di 12 siman.

Riba 1 di yúli 2021, FKUP i MEO huntu a organisá un webinar den kuadro di e di 27 edishon di selebrashon di dia Internashonal di Kooperativa. E tema di e aña ei tabata “Rekonstruí mihó huntu”.

Resientemente FKUP i Minister Cijntje tabata di bishita tambe na Rio Hacha, Colombia den

kuadro di produkshon i importashon di fruta i bèrdura. Esaki mester bai yuda pa garantisá ku pueblo por haña fruta i bèrdura na un preis pagabel.

E akuerdo di koperashon ta fortifiká e lasonan i trabounan ku FKUP i MEO a bini ta hasi huntu i ta enfoká riba stimulá i fasilidat e desaroyo di mas koperativa, spesífikamente di produkshon i servisio na Kòrsou.



Pa atrako

Detenshon di 3 hóben

WILLEMSTAD-- Relashoná ku un kaso di atrako ku a tuma lugá dia 31 di mei na un restaurant riba Winston Churchillweg, polis a realisá tres detenshon.

Djaluna 5 di yúni Tim di Atrako a hasi detenshon di tres hòmer sospechoso na e restaurant en kestion. Ta trata di C.C.J di 18 aña, V.V.D di 19 aña i D.D.P di

19 aña, tur tres nase na Kòrsou. Despues di e detenshonnan, personal di Tim di Atrako a tene tres entrada hudisial i a konfiská vários artíkulo importante pa e investigashon.

A presentá e sospechosonan dilanti di un fiskal ouksiliar ku a ordená nan enkarselamentu pendiente di mas investigashon.

ARUBA

Hoben hinca den garganta

ORANJESTAD -- Di-
asabra anochi varios unidad
policial y tambe ambulance
a bay den un caya den Palm
Beach, unda cu un persona
lo a yega cu un herida na su
garganta.

Na yegada di patruya

nan a constata cu ta trata
di hoben di 16 aña, cu lo
a wordo hinca un caminda
den su garganta.

Polisnan a logra saca
algun informacion di e mu-
cha, cu a papia cu e inciden-
te lo a tuma luga altura di

Palm Beach Plaza. E la bisa
tambe cu aparentemente
lo tawata trata di un grupo
grandi di hobennan di Da-
kota. Despues cu e la wordo
hinca asina mes e la logra
crusa caminda y yega den
un caya poco mas pa nort di

Wendy's Palm Beach, unda
cu polis y Paramediconan a
bin haye.


E area a wordo cera cu
lint geel, pa asina investiga-
cion cuminsa. Despues di a
stabilisa e hoben por a mira
cu e ambulance a sali cu ur-
gencia direccion Hospital.
No ta conoci e gravedad di
e hinca.

7 hoben deteni

Polis a logra pone man
ariba 7 hoben, esakinan a
wordo deteni ariba tereno
di dos hotel, tur a wordo
trece warda di Shaba.

Muy probablemente
esun cu a propina e hinca
lo por ta entre e grupo treci
warda.

Nos no por bisa si e gru-
po aki tur ta menor di edad
si of no. Un apelacion ta
bay si na mayornan, vakan-
tie ta den porta y lo ta bon
pa bo sa cu kende bo yiu ta
sali ariba weekend. Unda e
ta bay y ki ora e mester ta
na cas bek (si e ta menor).
Comunicacion entre ma-
yornan cu yiu ta suma-
mente importante, mester
tin e confiansa.



Cargamento di 100 ton mercancia a yega for di Venezuela

ORANJESTAD -- Ta-
bata den oranan tempran
di mainta cu e prome bar-
conan di fruta di Venezuela
a yega Aruba despues di
mas cu cuatro aña. E dos
barconan cu a yega tabata
El Maracucho y Gaviota
II, cu den pasado ya caba a
yega di bishita Aruba, treci-
endo mercancia for di pais
bisiña aki.

Aruba tabata e ultimo di
tres islanan cu a haya fruta

y berdura despues di reap-
ertura di frontera maritimo.
Den e biahe aki di casi 8 ora
a trece cahanan di mango,
banana, melon, promenton,
tomati, awacati, keshi y
diferente otro mercancia-
nan seco manera hariña
pan, maizena, chuculati,
condimentonan, etc.

E barco ta para den waf
di Barcadera unda cu e cli-
entenan por cumpra e mer-
cancia directamente for di

nan, pues na un prijs basta
bon compara cu loke tin
awo riba mercado local.

Rangel ta sigui conta cu
nan a trece por lo menos 35
ton p'awo, pasobra nan ta
cuminsando y tin mester di
tuma contacto mas hende
pa nan haci pedido di can-
tidad pa trece pa nan.

Ta pidi e supermerca-
donan y e consumidornan
pa bin pa haya na producto
fresco y di bon calidad y

bon prijs. E boto mes por
hinca entre 60 pa 70 ton di
mercancia.

Si tur cos bay bon, nan
por haya hopi mas cliente.
Simplemente nan mester
mas contacto p'asina nan

por traha cu nan.

Entre e dos barconan
aki, cu lo yega Aruba un
biaha pa siman, a trece riba
e prome biahe 100 ton di
mercancia.



DEPORTE

Premiashon torneo sòftbòl Si nos ke nos por

KRALENDIJK--Fin di siman pasá tabatin e final di e torneo di sòftbòl Si Nos Ke Nos Por, torneo ku a tuma lugá na Julio Angela Balpark ku su parti internashonal. Awe nos tin e resultadonan di e torneo den tur e kategorianan.

Kategoria Co-Ed.
Kampion bate ta Sen-drick Martha di The Fire 0.875 kampion.
Kampion picher ta Ju-drick Martha di The Fire 2 ganá supkampion The New Radiators. Kampion honronero Kelvin Marin di The

Dreamers ku 4 homerun.
MVP ta Ryan Emers di 3-2 ku 1 anotá 1 empuhá.
Kategoria Challenger.
Kampion bate Raynold Marchena di Black Sox 0857 kampion Among Us. Kampion picher Ruwel

Matrona Black Sox di 2-0 supkampion Black Sox.
Kampion honronero Jose Carlos Sint Jago di Rementá 4 homerun.
MVP ta Jonathan Martijn 3-2 ku 2 anotá 1 empuhá 1 homerun.

Kategoria komèrsial.
Kampion bate Lysandre Felida EWT 0.889 kampion The Living Legends. Rad-jin Polonia EWT 3 ganá supkampion EWT. Kampion honronero Lysandre Felida EWT 5 homerun.

Federashon Futbòl bastante aktivo

KRALENDIJK--Federashon di futbòl di nos isla ku ta FFB, ta bastante aktivo, tin basta trabou ta tumando lugá pa ku adelanto di futbòl di nos isla den su totalidat.

T'asina ku di 10 pa 13 di mei 2023, direktiva di FFB a kompletá 3 dia intensivo di treinen ehekutivo di maneho organisá dor di Concacaf.

Entrenadó di Concacaf pa esaki tabata Mr. Howard Mc. Intosch i Mr Horace

Reid. Komo un isla chikí ku ta miembro di Concacaf, e eksigensia ta konta igual pa tur 41 federashon di futbòl den Karibe i Merka.

For di e treinen a sali diferente punto di akshon ku FFB a comprometé su mes pa traha riba dje. Traha statuto nobo.

Bini ku un struktura di organisashon pa FFB. Traha un lista di tópiko ku mester skibi maneho i proseso di trabou.

Tarea i responsabili-

dat di tur komishon ta bon deskribí. Baha tareanan di direktiva ku ta den ehekushon. Traha un plan di akshon pa kumpli ku bon gobernashon. Tin un plan stratégiko aprobá 2024-2028.

Buta punto di agènda fiho riba agènda di direktiva pa asina por monitòr e desaroyonan.

Yega na un spònser pa un di e elekshonnan.

Kompartí e treinen aki ku tur miembro di FFB.

Trabounan andando na Jossy Ballpark

KRALENDIJK—Moveshonnan intensivo riba tereno di Jossy Ballpark. Por tuma nota di moveshon di trùknan di santu ku a kuminsá prepará e vèlt. Aktualmente

ta den e proseso di pone greis ku santu i pa finalmente pone yerba. Pronto Jossy Ballpark lo ta kla pa torneonan ku un vèlt nobo i bunita.



Hockey aktivo

KRALENDIJK—E deporte di hockey awor ta aktivo na Boneiru. Personanan di 18 aña òf mas grandi ku tin gana di hunga hockey, esaki ta e oportunidat. Ta buskando hungadónan entusiasma pa djòin e tim.

Riba djamars i djaweps

di 6'or di atardi pa 8'or di anochi, por partisipá na wega di hockey na Fèlt Elio Flores. Despues semper tin algu di bebe.

Un eksperensia di hockey ta dushi, pasobra ta bringa pa bon nivel di wega i trabou den tim. No tin

problema sí e persona no por hunga hockey, durante entrenamentu ta yega na komprondé e wega.

Hungadónan di tur nivel ta bon biní pa djòin i desaro-yá nan abilitat. Tin tantu stick i bala i te asta uniform presente.



Rekonosementu di parti La Fama

Durante bishita di e ekipo di futbòl veterano di Rincon, La Fama, na Hulanda, e ekipo a keda den e parke di fakansi Icebirds, na Voorthuizen. Cafe de Lindeboom tabata regularmente di bishita, esaki tabata komo ku tabata sirbi e ekipo bon. La Fama ta gradisí gerente i ekipo i komo muestra di apresio, a hasi entrega di un shirt komo souvenir di Boneiru.



Loura i Chupe pa promé biá na Boneiru

KRALENDIJK -- Fin di siman e konosido Loura i Chupe di Aruba, tabata na Boneiru. Nan a presentá durante un anochi di chiste, huntu ku dos artista konosí

den e mundu di komedia na Kòrsou. Ta trata di Encho i Boskwiri.

Tremendo anochi di chiste, dos artista di Kòrsou i dos di Aruba. Nan a

presentá un bunita anochi di chiste, hendenan a hari i gosa un bòl e anochi.

Kada figura a presentá su mes bon.



50" 4K
Smart TV



\$439

LG Soundbar

\$229



Apple and Samsung
Smartphones
with warranty
and support



CityShop

Smart shopping ▶ Better living

Best DAD EVER.

30
ANIVERSARIO



\$699

Playstation 5



Sony Wireless
Headset for PS5

\$125

Nintendo
Switch Oled

\$449

